

→ MUKA SEPULUH

DARI KACA MATA

→ Datuk Seri Idris Jusoh
Menteri Pendidikan Tinggi



Kejayaan ini tidak dicapai dalam sekilip mata tetapi hasil usaha yang tapaknya telah disemai sejak beberapa tahun lalu”

Hari ini, Malaysia adalah rumah kepada lebih 10 universiti antarabangsa terkemuka dan tertinggi di Asia”

Kejayaan hari ini adalah hasil asas yang diusahakan oleh bekas Menteri Pendidikan Tinggi dan pemimpin negara ini sejak beberapa tahun lalu”

Misi ‘peningkatan berterusan’ mutu pendidikan tinggi

Sebelum tidur beberapa hari lalu, saya menerima mesaj WhatsApp daripada Naib Canselor Universiti Malaya (UM), Profesor Tan Sri Dr Amin Jalaludin. Beliau memberitahu bahawa UM telah berjaya dinobatkan sebagai universiti ke-27 terbaik di Asia menurut ‘QS University Rankings Asia 2016’ yang baharu diumumkan. Ini adalah tahun ketiga berturut-turut UM memperbaiki kedudukannya, daripada tempat ke-29 pada 2015 dan ke-32 pada 2014.

Pada hari berikutnya, saya juga menerima berita daripada Naib Canselor Universiti Putra Malaysia (UPM), Profesor Datin Paduka Dr Aini Ideris, bahawa UPM juga meningkat 17 tangga, daripada tangga ke-66 pada 2015 ke tangga ke-49 pada tahun ini. Buat kali pertama, UPM berada di kedudukan 50 teratas di Asia!

Selain UM dan UPM, tiga Universiti Penyelidikan (UP) yang lain berada dalam kelompok 100 terbaik di Asia, iaitu Universiti Sains Malaysia (51), Universiti Kebangsaan Malaysia (55) dan Universiti Teknologi Malaysia (63). Dua universiti swasta juga berjaya tersenarai dalam kelompok 200 terbaik di Asia, iaitu Universiti Teknologi PETRONAS (127) dan Universiti Taylor’s (179). Tahniah diucapkan kepada semuanya.

Dalam beberapa penulisan saya sebelum ini, saya banyak berkongsi kisah kejayaan pendidikan tinggi. Laungan *soaring upwards* atau ‘peningkatan berterusan’, yang menjadi slogan Kementerian Pendidikan Tinggi, wujud sebagai pengiktirafan realiti bahawa pendidikan tinggi negara sedang bertambah baik.

Projek Universiti Penyelidikan
Hakikatnya, kejayaan ini tidak dicapai dalam sekilip mata tetapi hasil usaha yang tapaknya telah disemai sejak beberapa tahun lalu. Pada 2006, Menteri Pendidikan Tinggi ketika itu, Datuk Seri Mustapa Mohamed, memperkenalkan projek UP.

Projek UP bertujuan meningkatkan keupayaan penyelidikan dan penerbitan serta hasil universiti awam (UA), termasuk memacu landskap pendidikan tinggi Malaysia ke tahap tinggi. Projek UP dimodelkan daripada usaha diambil negara seperti Korea Selatan yang menunjukkan pencapaian luar biasa, dengan mereka sendiri memperkenalkan universiti berstatus penyelidikan.

Alhamdulillah, dalam tempoh 10 tahun, kelima-lima Universiti Penyelidikan negara, iaitu UM, UPM, USM, UKM dan UTM bukan sahaja cemerlang dalam negara, tetapi juga mencipta nama dalam

landschap pendidikan tinggi global. Semuanya berada dalam kedudukan satu peratus universiti terbaik di dunia, menawarkan subjek dalam kelompok 50 dan 100 terbaik dunia (seperti pengajian pembangunan dan kejuruteraan elektrik), mempunyai penyelidik yang diiktiraf di peringkat antarabangsa dan berjaya menghasilkan bakat bertaraf dunia.

Menteri Pendidikan Tinggi sebelum saya, Datuk Seri Khaled Nordin, memainkan peranan cukup penting dalam memastikan kemampamanan Projek UP.

Pada 2000, Nottingham University menubuhkan sebuah kampus di Malaysia. Ia adalah kampus universiti Britain yang pertama di Malaysia dan antara yang pertama dibuka di luar Britain. Sebelum ini, tidak ramai membayangkan universiti Britain di luar Britain, apatah lagi di Malaysia.

Ini dapat direalisasikan hasil usaha Perdana Menteri kita, Datuk Seri Najib Razak yang juga adalah alumni universiti itu. Pembukaan kampus cawangan Nottingham University adalah penting dalam meletakkan Malaysia di peta pendidikan tinggi global dan secara langsung meningkatkan keyakinan universiti antarabangsa terkemuka untuk berta-pak di Malaysia.

Hari ini, Malaysia adalah rumah kepada lebih 10 universiti antarabangsa terkemuka dan tertinggi di Asia. Lima daripadanya berasal dari Britain (Nottingham, Reading, Newcastle, Southampton dan yang terbaru Heriot-Watt), menjadikan Malaysia negara dengan institusi Britain di luar Britain yang paling besar.

Malaysia juga rumah kepada universiti antarabangsa dari Australia (Monash, Swinburne, dan Curtin), China (Xiamen) dan Singapura (Raffles). Sebahagian kampus cawangan antarabangsa itu bertapak di Bandar Pendidikan Iskandar, Johor - sebuah bandar pendidikan bersepadu sepenuhnya dengan ruang pembelajaran, ruang runcit, dan stadium sukan. Idea ini terhasil pada zaman Khaled, yang kini Menteri Besar Johor.

Baru-baru ini, Bank Negara Malaysia dengan kerjasama Massac-

husetts Institution of Technology (MIT) Sloan School of Management, universiti termashyur dunia, menubuhkan Asia School of Business (ASB) yang menawarkan kursus eksekutif bertaraf dunia yang bakal bermula September 2016 ini. Bayangkan, MIT di Malaysia.

Sasar RM15.6 billion pada 2020
Kehadiran institusi pendidikan tinggi antarabangsa ini meletakkan Malaysia di peta pendidikan global. Dengan lebih 151,000 pelajar antarabangsa menyumbang hampir RM8 bilion kepada ekonomi negara kita pada masa ini, Malaysia berada di landasan betul untuk mencapai matlamat membawa masuk 200,000 pelajar antarabangsa ke Malaysia pada 2020, yang dijangkakan akan menyumbang lebih kurang RM15.6 bilion kepada ekonomi negara.

Sesungguhnya, kejayaan hari ini adalah hasil asas yang diusahakan oleh bekas Menteri Pendidikan Tinggi dan pemimpin negara ini sejak beberapa tahun lalu. Hasil ini juga daripada kerja keras penyelidik dan pensyarah universiti, serta kepimpinan tertingginya.

Melangkah ke hadapan, Kementerian Pendidikan Tinggi adalah berpanduan kepada Pelan Pembangunan Pendidikan Malaysia 2015-2025 (Pendidikan Tinggi), yang menjadi satu dokumen strategik yang diiktiraf di peringkat antarabangsa. Saya yakin bahawa pelan ini akan membawa kita ke arah kejayaan yang lebih besar pada masa akan datang.

Saya bangga dapat meneruskan kerja baik menteri pendidikan tinggi sebelum ini, Perdana Menteri sendiri, dan usaha Kerajaan Barisan Nasional (BN). Tanpa syak lagi, pendidikan sentiasa dan akan terus menjadi keutamaan BN.

→ Dalam sedikit masa lagi, kita akan mengetahui siapa ahli akademik dinobatkan sebagai Tokoh Akademik Negara (AAN). Pengarah Pusat Media dan Perhubungan Awam, Universiti Sains Malaysia (USM), Mohamad Abdullah, mengupas isu ini, esok dan melihat bagaimana tokoh akademik memberi jiwanya untuk pembangunan masyarakat tanpa perlu bersikap kontroversi dan menonjok arus.